



Jeddah Midwest Dawah Association

جَمْعِيَّةُ وَسَيْطٍ وَعَرَبِ جِدَّةِ الْأَهْلِيَّةِ  
لِلدَّعْوَةِ وَالْإِشَادَةِ تَوْعِيَّةً لِلْجَالِيَّةِ

# Magbalik Islam Isang Bukas na Paanyaya



عُدْ إِلَى الْإِسْلَامِ  
اللُّغَةُ الْفَلِبِينِيَّةُ

## **MAGBALIK ISLAM ISANG BUKAS NA PAANYAYA**

Ang papuri ay sa Allah lamang. Ang pagpupugay at kapayapaan ay sumasakaniyang Propeta na si Muhammad, sa kaniyang sambayanan, at mga kasamahan.

Magbalik Islam, isang paanyayang ginagamit ng mga Muslim sa pangangaral ng salita ng Allah, upang hikayatin ang isang tao na magbalik sa tunay na relihiyon na ibinigay sa kaniya ng Allah. Paanyayang iniutos ng Allah sa Banal Qur'an.

**"Mag-anyaya ka sa Landas ng Panginoon mo sa pamamagitan ng karunungan at magaling na pangangaral, at makipagtalos kayo sa kanila sa pamamagitan ng siyang pinakamagaling. Tunay na ang Panginoon mo ay Siya ang higit na nakaaalam sa sinumang naligaw sa landas Niya at Siya ang higit na nakaaalam sa mga napatnubayan."** (Qur'an 16:125)

May dalawang dahilan kung bakit dapat tayong magbalik-Islam:

1. Sapagka't ito ang tanging relihiyon na ibinigay ng Diyos sa lahat ng Kaniyang nilikha.
2. Sapagka't ito rin ang unang relihiyon na sinunod ng mga ninunong Pilipino bago pa dumating ang mga Kastila.

### **ANO ANG ISLAM?**

Ang Islam ay isang salitang Arabik na nangangahulugan ng ganap na pagsuko at pagpapasakop sa nag-iisang Diyos. Kapag ito ay ginamit sa terminong pangrelihiyon, ang kahulugan ay ganap na pagpapasakop at pagsunod sa nag-iisang Diyos - Ang Allah. Ang salitang Islam ay nagmula sa salitang "Salam" na ang kahulugan ay kapayapaan. Kaya't ang sinumang ganap na nagpapasakop at tumatalima sa utos ng Allah ay tumatanggap mula sa Kaniya ng tunay na kapayapaan.

### **ANO ANG MUSLIM?**

Ang salitang Muslim ay katawagan sa isang nilalang na ganap na nagpapasakop, tumanggap at tumatalima sa mga utos ng Allah.

### **SINO ANG ALLAH?**

Ang Allah ang pantanging pangalan ng Tagapaglikha. Siya ay walang anak, hindi Siya ipinanganak at Siya ay walang katulad. Siya ay hindi lamang Diyos ng mga Muslim o ng isang tribo o pangkat ng tao, bagkus Siya ang Diyos ng lahat na karapat-dapat sambahin.

Ang Allah ay maliwanag na nagpahayag ng Kanyang sarili ayon sa sumusunod: **"Ang Allah, walang Diyos kundi Siya, ang Buhay, ang Tagapag-aruga.**

Hindi Siya natatangay ng antok ni ng pagkatulog. Kanya ang anumang nasa mga langit at ang anumang nasa lupa. Sino kaya ang makapamamagitan sa Kanya nang walang kapahintulutan Niya? Nalalaman Niya ang hinaharap nila at ang nakaraan nila. Wala silang matatalos sa anuman mula sa kaalaman Niya maliban sa ninais Niya. Nasaklawan ng luklukan Niya ang mga langit at ang lupa. Hindi nakabibigat sa Kanya ang pangangalaga sa mga ito. Siya ay ang Mataas, ang Dakila. (Qur'an 2:255)

Pinananatili ng mga Muslim na Siya ay tawagin sa Kanyang pangalang Allah sa dahilang Siya mismo ang nagbigay ng Kanyang pangalan sa Kanyang Propeta.

## **DALAWANG URI NG PAGSUNOD SA DIYOS**

May dalawang uri ng pagpapasakop at pagsunod sa nag-iisang Diyos.

### **1. LIKAS NA PAGSUNOD:**

Ang Likas at di-maiiwasang pagsunod sa kalooban ng Allah. Ang lahat na nilikha ay nasasakop o sumasailalim sa "Likas na pagsunod". Walang sinumang nilikha ng Allah ang maaaring tumanggi at sumuway sa Kanyang mga kautusan. Halimbawa, ang araw ay binigyan ng Allah ng kautusan na sumikat at lumubog sa oras na itinakda sa kaniya, na ito ay manatili sa lugar na itinalaga sa kanya. Ito ay hindi dapat na lumapit o lumayo kahit bahagya man sa mundo, kaniyang tungkulin na magbigay ng liwanag, init at iba pa. Magkagayon, ang araw ay matatawag na Muslim sa likas nitong pagsunod sa kautusang ibinigay ng Diyos.

### **2. KUSANG-LOOB NA PAGSUNOD:**

Ang kusang-loob na pagsunod sa mga utos ng Allah (Islam by choice), ay pagsunod nang may pagpapasya, maaari niya itong sundin o hindi, Siya ay may layang magpasya ayon sa kaniyang nais. May dalawang uri sa mga nilikha ng Allah ang pinagkalooban Niya ng layang pumili at magpasya ayon sa kanilang sariling kagustuhan. Ito ay ang jinn at tao.

Dapat nating mabatid na ang isang tunay na Muslim ay hindi yaong nagsasabi na siya ay isang Muslim o ipinanganak sa bansang Muslim. Ang tunay na Muslim ay hindi rin yaong mga tao na ang mga magulang ay Muslim. Hindi ito ang pagkakakilanlan sa isang tunay na Muslim. Ang tunay na Muslim ay yaong mga tunay na sumusunod ng walang pasubali sa mga batas ng Allah at tanging Siya lamang ang pinag-uukulan ng pagsamba.

Kaya, nararapat na tayo ay magbalik-Islam, sapagka't ito ang relihiyon ng lahat ng mga nilikha ng Diyos. Tayo ay binigyan ng layang pumili upang sumailalim sa "Kusang-loob na pagsunod". Kabilang sa kalayaang ito ay ang piliin ang relihiyon na ibinigay sa atin ng Allah: Ito ay ang Al-Islam.

## **ANG TAO SA ILALIM NG "FITRAH"**

Ang tao sa Simula pa lamang nang silya ay likhain ng Allah siya ay sumasailalim na sa "Likas na pagsunod". Sa sinapupunan pa lamang ng kaniyang Ina, ang tao ay nakasalig sa pagpapala at paggabay ng Allah, siya ay hindi sumusuway sa lahat ng kautusang itinakda sa kaniya ng Diyos.

Sa bahaging ito ng buhay ng tao, siya ay nasa ilalim ng tinatawag na FITRAH na nangangahulugan ng likas na pagsunod ng tao sa kalooban ng Diyos. Ang estadong ito ng tao sa ilalim ng FITRAH ay hindi nawawala, ngunit maaaring malihis, malayo o maligaw. Sa Simula pa lamang, ang tao ay nasa tamang relihiyon (Islam) ng ganap na pagsunod at pagsamba sa iisang Diyos, (ang Allah) hanggang sa siya ay isilang.

Sa dahilang ang bata ay wala pang lakas at hindi pa wasto ang kaisipan at talino na pumili at magpasya ayon sa kaniyang sariling kagustuhan, siya ay sunud-sunuran lamang sa lahat ng nais gawin ng kaniyang mga magulang o ng mga taong nagaruga at nagpalaki sa kaniya. Ang mga taong ito sa kaniyang paligid ang siyang may kakayahang akayin siya sa tama o maling landas ng pagsamba. Sinabi ni Propeta Muhammad:

**"Ang bawa't sanggol ay ipinanganak sa ilalim ng "FITRAH", nguni't ang kaniyang mga magulang ay ginawa siyang isang Hudyo, o Knstiyano, o Pagano... (Sahih Muslim vol. 4 p 1398 # 6423)**

Magkagayon, kung ang isang tao ay mabuhay ng nag-iisa at lumaking malayo sa anumang sibilisasyon, mamumuhay siyang kumikilala na mayroong nag-iisang Diyos na sa kaniya ay Lumikha. Kaya't kailanman ay hindi mangyayaring siya ay maging isang Hudyo, Kristiyano, o isang Pagano (tulad ng Hindu o Buddismo). Katiyakan na ang kanyang sasambahin ay ang nag-iisang Diyos na may likha ng Langit at Lupa at ng lahat ng mga nilikha, sapagka't ito ang kanyang Fitrah (kalikasan) na ibinigay ng Diyos na hindi pa nabahiran ng maling katuruan.

Tulad ng katawan ng tao, sa simula ay nagpapasakop sa mga batas na itinakda ng Allah. Ganoon din naman, ang kaniyang puso at kaluluwa ay nagnanais na tumalima, sumunod at magpasakop sa Allah. Ngunit ang kaniyang mga magulang o mga tagapag-alaga ay pinalaki siya at tinuruan na sumunod

sa kanilang mga pansariling paniniwala. Ang mga paniniwalang ito ay turo at utos lamang ng tao at hindi utos ng Lumikha.

Sa paglaki ng tao, ang relihiyon na kaniyang sinusunod ay hindi piniling kusa. bagkus ang relihiyong kaniyang sinunod ay tao lamang ang may gawa at turo lamang ng kanyang kapwa.

Sa sandaling sapitin na ng tao ang wastong gulang at kaisipan at kaniya nang malaman ang tama sa mali, dapat na niyang alamin ang buong katotohanan. Nararapat siyang pumili at magpasya ayon sa sariling kalooban at kaisipan. Piliin at magpasya na sundin ang tunay na relihiyon na ibinigay ng Allah, ang pagpapasakop lamang sa Allah. Sa kalagayang ito, siya ay sasailalim na sa "Kusang-loob na pagsunod" sa Diyos. Sinasabi sa Qur'an: **"Pinatnubayan Namin siya sa dalawang landas, (kabutihan at kasamaan)** (Qur'an 90:10)

**BABALA!!!** Sa bahaging ito ng buhay ng tao, ang Satanas ay gagawa ng lahat ng paraan upang ang tao ay mapanatili niya sa maling relihiyon. Gagamitin ng Satanas ang mga magulang, kapatid, asawa, anak, kamag-anak, kaibigan, trabaho, kapitbahay, atbp., para larnang mapanatili niya ang tao sa maling relihiyong kaniyang kinagisnan.

Dito masusubukan ang pagpapasya ng isang tao kung papaano niya gagamitin ang kalayaang pumili ng tamang relihiyong nakalulugod sa Diyos na lumikha sa kanya.

Katotohanan na may malaking bilang ng tao ang nagsasabing mayroon silang sinusunod na relihiyon, ngunit ang relihiyon na kanilang pinaniniwalaan ay hindi sila ang pumili. Ito'y kanila lamang kinagisnan o ipinayakap larnang sa kanila. Hindi sila ang pumili at hindi sila ang nagpasya.

Ang bawa't tao ay pinagkalooban ng Allah ng layang pumili... ginamit mo ba ang kalayaang ito? Ikaw ba'y kabilang sa mga taong hindi pinili ang relihiyong sinusunod at pinaniniwalaan ?

Kung piliin mong sundin ang iyong FITRAH, ang iyong likas na Pagsunod at pagsamba sa nag-iisang Diyos - ang Allah, ikaw ay tutulungan Niya, sapagka't nasasaad sa Banal na Qur'an:

**"Kaya ang sinumang nanaisin ng Allah na patnubayan sa Islam, paluluwagin Niya ang dibdib nito sa Islam"** (Qur'an 6:125)

Alalahanin: Ito ang dalawang uri ng pagsunod, Likas at Kusang-loob.

Kung marami man ang hindi naniniwala sa Allah bilang nag-iisang Diyos na dapat pag-ukulan

ng pagsamba, dapat bang maging isa ka sa kanila? Kung ikaw man ay nailihis lamang ng paniniwala o naturuan ng maling relihiyon ng ibang tao, nararapat kang magpasya at piliin ang pagsunod sa kalooban ng Diyos. Ikaw ay magbalik sa Kanya!!

### **Ikaw ay magpasya, ikaw ay magbalik-Islam:**

Ito ang unang dahilan kung bakit dapat kang magbalik-Islam, sapagka't ito ang tunay mong relihiyon, ang relihiyon ng lahat ng nilalang, ang relihiyon maging ng ating mga Ninuno.

### **Maikling Kasaysayan Ng Islam Sa Pilipinas:**

Ang ikalawang dahilan kung bakit hinihimok ko kayong magbalik-Islam ay batay na rin sa natatagong kasaysayan ng relihiyon sa ating bansa.

Bago pa dumating sa Pilipinas ang iba't-ibang aral tungkol sa pananampalataya, likas na sa ating mga ninunong Pilipino ang sumamba sa Diyos. Bagama't ito ay hindi ayon sa katotohanan, sapagka't sila ay maibibilang sa tinatawag na "ANIMIST" o mga taong sumasamba sa lahat na halos ng mga bagay na nilikha maliban sa Dakilang Lumikha. Ngunit nang dumating ang aral ng Islam, nagkaroon ng pagbabago sa kanilang buhay at relihiyon. Naitatag nila ang isang pamayanang Muslim. Ngunit ito'y hindi nagtagal. Nang dumating ang dayuhang Kastila sa bansang Pilipinas, sinakop nila ito at pinilit nilang palitan ang relihiyong Islam sa pamamagitan ng dulo ng espada.

Ang relihiyong Islam ay unang inihayag sa Pilipinas noong 1380 ng isang Arabo na si Sharif Makhdum, Itinayo niya ang unang mosque sa Pilipinas sa Tubig Indangan, Simunul, Tawi Tawi.

Noong 1390, si Rajah Baginda ay dumating sa bansang Pilipinas at itinuloy niya ang naiwang gawain ni Sharif Makhdum. Gayundin din naman, dumating din si Abu Bakr sa Jolo noong 1450 na siyang nagpasimula ng Sultanate sa Sulu.

Matapos maitatag ang relihiyong Islam sa Sulu, ang mga Muslim ay kumilos patungong Mindanao sa pamumuno ni Sharif Kabungsuwan. Sila ay dumaong sa Maguindanao (ngayon ay Cotabato) noong 1475.

Nang sumunod na mga taon, maraming Muslim na mga Datu mula sa Borneo ang dumating sa Pilipinas nang mabalitaan nila ang mabuting pagtanggap ng mga Pilipino.

Dumating sa bansang Pilipinas ang sampung Datu at sila ay dumaong sa Panay. Ang mga Datung ito ay sina Datu Puti, Datu Sumakwel, Bangkaya, Dumangsol, Paiburong, Paduhinog, Ubay, Dumangsil, Dumalogdog at Balensula (ngayon ay Valenzuela).

Si Datu Puti ang pinuno ng pangkat na ito sapagka't bihasa siya sa paglalakbay dagat. Sila ay dumaong sa San Joaquin, Iloilo (noong araw ay kilala sa tawag na Siwaragan). Si Datu Puti at ang kaniyang siyam na mga kasamahan ay binili ang mababang bahagi ng Iloilo kay Marikudo, ang pinuno ng mga Itas (pygmies) at naitatag nila nang ganap ang komunidad ng Islam doon. Nang ang komunidad ng Islam ng mga taga Borneo ay ganap nang naitatag sa Panay, si Datu Puti, Datu Balensula at Datu Dumangsil ay naglayag patungong norte at sila'y dumaong sa Batangas.

Itinatag ni Datu Balensula at Datu Dumangsil ang kanilang komunidad doon sa Batangas subali't si Datu Puti ay nagbalik sa Borneo at bumagtas sa Mindoro at Palawan. Nang sumapit siya sa Borneo ay ibinalita niya ang kanilang naging karanasan. Bunga nito higit na marami pang mga taga Borneo ang naakit na magpunta sa Pilipinas.

### **Ang Pagdating ng mga Kastila at Kristiyanismo:**

Nang dumating si Magellan sa Limasawa noong Marso 16, 1521, ang Pilipinas ay isa nang bansang Muslim. 144 taon na ang relihiyong Islam sa bansang Pilipinas bago pa dumating ang mga Kastila o ang Kristiyanismo. Isang bansang sumasamba sa nag-iisang Diyos, ang Allah.

Katotohanang nakatala sa kasaysayan ng bansang Pilipinas na nang dumating si Legaspi (kapalit ng namatay na si Magellan), ang komunidad ng mga Muslim ay ganap ng naitatag sa Batangas, Pampanga, Mindoro, Panay, Catanduanes, Cebu, Samar, Manila, Palawan, Mindanao at Sulu Ang unang Muslim na nagtanggol sa kalayaan ng Pilipinas at relihiyong Islam ay si Gat Lapu Lapu.

Noong Hunyo 3, 1571 ay naglunsad ang mga Kastila ng isang malaking pakikidigma sa mga Muslim sa Maynila. Ang Maynila noon ay pinamumunuan ni Rajah Soliman. Ipinagtanggol niya ang Maynila at Islam hanggang sa kanyang kamatayan doon sa Bangkusay sa baybay dagat ng Tondo. Matapos magapi ng mga Kastila si Rajah Soliman at ang kaniyang mga kapanalig ay pinagpapatay ng mga Kastila ang maraming Muslim, bata man o matanda.

Dahil sa mahinang uri ng sandata na taglay ng mga Muslim (bolos at sibat) laban sa baril at kanyon ng mga Kastila, sila ay napilitang umatras at lumikas patungong probinsiya ng Rizal at ang lugar na iyon ay kilala sa ngayon sa tawag na Morong Rizal, at yaong mga lumikas patungo sa gilid ng mga ilog ay tinawag sa ngayon ng Tagalog (taga ilog) gaya ng Cavite, Laguna atbp. Ang mga Muslim sa bayan ng Rizal ay patuloy na nakipaglaban sa mga Kastila at ang lugar na iyon ay kinilala sa ngayon na Binangonan Rizal.

Ang mga Kastila ay nagtatag ng kanilang punong himpilan sa Maynila at ipinagpatuloy ang pagsakop sa Isla ng Bisaya. Ang mga Muslim na hindi namatay sa labanan ay napilitang ipatat'wa ang relihiyong Islam at ipinayakap ang relihiyon ng mga Kastila, ang Kristiyanismo sa dulo ng espada. Ngunit ang mga tapat na Muslim ay pinili pa ang libingan kaysa lisanin ang pagsamba sa nag-iisang Diyos ang Allah.

Ang mga Kastila ay hindi tumigil sa pananakop at hinangad nila na sakupin din pati ang Mindanao ngunit ang mga Muslim dito gaya ng Maranaw, Maguindanao, Tausog, Yakan, Samal at Sangil ay buong tapang at buong giting na nagtanggol at hindi pinayagan ang nais ng mga dayuhan. Nagtanggol sila at patuloy pa ring ipagtatanggol ang Islam hanggang sa ngayon.

Namayani ang mga Kastila sa bansang Pilipinas sa loob ng may apat na raang taon (400). Napakahabang panahon ang pagpipilit na lipulin ang lahat ng mga Muslim upang mabura nila sa kasaysayan ng Pilipinas ang relihiyong Islam. Ngunit sila ay nabigo, hanggang sa ang pamumuno ng mga Kastila ay magwakas noong 1898 nang agawin ng bansang Amerika ang Pilipinas.

Lumasap man ng pansamantalang pagkalupig ang bansang Pilipinas, ang relihiyong Islam na bigay ng Dakilang Lumikha ay mananatiling nakatayo at matatag, na kailan man ay hindi matitinag.

### **Ikaw Ay Magbalik Islam.**

Isang Bukas Na Paanyaya: **"Ang sinumang maghahangad ng iba pa sa Islam bilang relihiyon, hindi iyon matatanggap sa kanya at siya sa Kabilang buhay ay kabilang sa mga mapapahamak."**  
(Qur'an 3:85)

920008669

0558845030



[www.jeddawa.sa](http://www.jeddawa.sa)

JedDawaSA

مسجلة في المركز الوطني لتنمية القطاع غير الربحي برقم ( ٣١٩٧ )

SA6780000223608010010008

SA0510000013149477000102